

元

史

四四

傳卷第三十一

元史一百四十四

翰林學士中大夫知制誥兼修國史臣宋濂翰林待制高麗知制誥兼國史院編修官臣王禕等奉
勅修

答里麻

答里麻高昌人大父撒吉斯爲遼王傅世祖稱其賢從討李璮以勲授山東行省大都督答里麻弱冠入宿衛大德十一年授御藥院達魯花赤遷回回藥物院尋出僉湖北山南兩道廉訪司事召拜監察御史時丞相帖木迭兒專權貪肆答里麻帥同寅亦憐直馬祖常劾其罪高昌僧恃丞相威違法娶婦南城答

里麻詰問之奮不顧利害風紀由是大振擢河東道
廉訪副使隰州村民賽神因醉毆殺姚甲爲首者乘
閑逃去有司逮同會者繫獄歷歲不決荅里麻曰殺
人者既逃存亡不可知此輩皆誣誤無罪而反桎梏
耶悉縱之至治元年帖木迭兒復相以復讎爲事荅
里麻辭去明年改燕南道廉訪副使開州達魯花赤
石不花歹頗著政績同僚忌之嗾民誣其與民妻俞
氏飲荅里麻察知俞氏乃八十老嫗石不花歹實不
與飲酒於是抵誣告者罪石不花歹復還職行堂縣
民斫桑道側偶有人借斧削其杖其人夜持杖刦民

財事覺并逮斧主與盜同下獄笞里麻原其未嘗知情即縱之深州民媼怒毆兒婦死婦方抱其子子亦誤觸死媼年七十同僚議免刑答里麻不可曰國制罪人七十免刑爲其血氣已衰不任刑也媼既能殺二人何謂衰老卒死獄中至治元年除濟寧路總管興學勸農百廢具修府無停事濟陽縣有牧童持鐵連結擊野雀誤殺同牧者繫獄數歲笞里麻曰小兒誤殺同牧者實無殺人意難以定罪罰銅遣之泰定元年陞福建廉訪使朝廷遣宦官伯顏催督綉段橫取民財宣政院判官术鄰亦取賂于富僧笞里麻皆

劾之遷淵西廉訪使會文宗發江陵阿兒哈禿來諭
旨求賂不獲還諧于朝召至京處以重罪比至帝怒
解遷上都同知留守天曆元年八月明宗崩文宗入
正大統使者旁午答里麻朝暮盡力事無缺失帝特
賜錦衣以嘉之天曆三年遷淮東廉訪使明年召拜
刑部尚書國制新君即位必賜諸王駙馬妃主及宿
衛官吏金帛答里麻曰必唱名給散無虛增之數國
費大省帝復賜黃金腰帶以旌其能元統元年陞遼
陽行省參知政事高麗國使朝京道過遼陽謁省官
各奉布四疋書一幅用征東省印封之答里麻詰其

使曰國制設印以署公牘防姦僞何爲封私書况汝
出國時我尚在京未爲遼陽省官今何故有書遺我
汝君臣何欺詐如是耶使辭屈還其書與布元統三
年遷山東廉訪使時山東盜起陳馬驥及新李白晝
殺掠答里麻以爲官吏貪污所致先劾去之而後上
擒賊方略朝廷嘉納之即遣兵擒獲齊魯以安除大
都路留守帝宴大臣於延春閣特賜答里麻白鷹以
表其貞廉帝嘗命答里麻修七星堂先是修繕必用
赤綠金銀裝飾答里麻獨務樸素令畫工圖山林景
物左右年少皆不然歲秋車駕自上京還入觀之

乃大喜以手撫壁嘆曰有心哉留守也賜白金五十
兩錦衣一襲至正六年陞河南行省右丞改翰林學
士承旨至正七年遷陝西行臺中丞時年六十九致
事後召商議中書平章政事不拜全俸優養終身

月魯帖木兒

月魯帖木兒卜領勤多禮伯臺氏曾祖貴裕事太祖
爲管領怯憐口怯薛官祖合刺襲父職事世祖父普
蘭奚由宿衛爲中書右司員外郎與丞相哈刺哈孫
建議迎立武宗累遷至山北遼東道肅政廉訪使月
魯帖木兒幼警穎讀書強記淑儻有大志年十二成

宗命與哈刺哈孫之子脫歡同入國學仁宗時入宿衛一日帝顧問左右曰斯人容貌不凡誰之子耶左右忘其父名月魯帖木兒即對曰臣父普蘭奚也帝曰汝父贊謀以定國難朕未嘗忘因命脫忽台傳旨四怯薛札撒火孫令常侍禁廷毋止其入哈刺哈孫欲用爲中書蒙古必闇赤輒辭焉哈刺哈孫曰汝年幼欲何爲乎對曰欲爲御史爾人壯其志久之遂拜監察御史巡按上都劾奏太師右丞相帖木迭兒受張弼賄六萬貫貸死帝怒碎太師印賜月魯帖木兒鈔萬貫除兵部郎中拜殿中侍御史遷給事中左侍郎

儀同脩起居注尋爲右司郎中賜坐便殿帝顧左右謂曰月魯帖木兒識量明遠可大用者也他日帝語近臣曰朕聞前代皆有太上皇之號今皇太子且長可居大位朕欲爲太上皇與若等游觀西山以終天年御史中丞蠻子翰林學士明里董阿皆稱善月魯帖木兒獨起拜曰臣聞昔之所謂太上皇若唐玄宗宋徽宗皆當禍亂不得已而爲之者也願陛下正大位以保萬世無疆之業前代虛名何足慕哉帝善其對仁宗崩帖木迭兒復入中書據相位叅議乞失鹽以受人金帶繫獄帖木迭兒乃使乞失鹽憇月魯帖

木兒爲御史時誣丞相受賄皇太后命丞相哈散等
即徵政院推問不實事遂釋帖木迭兒乃奏以月魯
帖木兒爲山東鹽運司副使降亞中大夫爲承事郎
期月間鹽課增以萬計丁外艱扶喪西還擢山南江
北道肅政廉訪副使泰定初遷汴梁路總管再調總
管武昌以養親不赴致和元年河南行省平章伯顏
矯制起月魯帖木兒爲本省叅知政事共議起兵月
魯帖木兒固辭曰皇子北還問叅政受命何人則將
何辭以對伯顏怒會明里董阿迓皇子過河南而月
魯帖木兒爲御史時嘗劾其娶娼女冒受封明里董

阿因說伯顏收之丞相別不花亦與之有隙乃謫月
魯帖木兒乾寧安撫司安置至順四年移置雷州至
元六年順帝召之還至正二年入覲帝欲留之以母
喪未葬辭四年乃起同知將作院事尋除大宗正府
也可札魯花赤九年由大醫院使拜翰林學士承旨
知經筵事進讀之際引援經史壹本於王道帝嘉納
焉十二年江南諸郡盜賊充斥詔拜月魯帖木兒平
章政事行省江淵因言于丞相脫脫曰守禦江南爲
計已緩若得從權行事猶有可爲不從陞辭賜尚醞
御衣弓矢甲冑衛卒十人鈔萬五千貫以行比至鎮

引僚屬集父老詢守備之方招募民兵數千人號令
明肅統師次建德獲首賊何福斬于市遂復淳安等
縣俘獲萬餘人復業者三萬餘家是年七月次徽州
以疾卒于軍中

卜顏鐵木兒

卜顏鐵木兒字珍鄉唐兀吾密氏性明銳倜儻早備
宿衛歷事武宗仁宗英宗天曆初由太常署丞拜監
察御史陞殿中侍御史累除大都路達魯花赤都轉
運鹽使肅政廉訪使由行中書省叅知政事陞左右
丞擢行御史臺中丞遂拜江淵行省平章政事至正

十二年春，蘄黃賊徐壽輝遣兵陷湖廣，侵江東西。詔
卜顏鐵木兒率軍討之。卜顏鐵木兒益募壯健為兵，
得驍勇士三千人，戰艦三百艘。時湖廣平章政事也
先帖木兒江西平章政事星吉江南行臺御史中丞
蠻子海牙皆以兵駐太平宿留不進。卜顏帖木兒至
乃與俱前，賊方聚丁家洲。官軍猝與遇，奮擊敗之，遂
復銅陵縣，擒其賊帥。復池州，遂分遣萬戶普賢奴屯
陽陵，王建中屯白面渡，閻兒討無爲州，而自率鎮撫
不花萬戶明安駐池口，以防遏上流，為之節度。已而
江州再陷，星吉死之。蠻子海牙及威順王寬徹、普化

軍俱潰而東安慶被圍益急遣使來求援諸將皆欲
自守信地卜顏鐵木兒曰何言之不忠耶安慶與池
州隔一水今安慶固守是其節也而救患之義我其
可緩且上流官軍雖潰然皆百戰之餘所乏者錢穀
器具而已吾受命總兵其可視之而不恤哉即大發
帑藏以周之潰軍皆大集而兩軍之勢復振安慶之
圍遂解十三年三月賊衆復來攻池州衆且十萬諸
縣皆應之卜顏帖木兒會諸將謀曰賊表裏連結若
俟其築壘成而坐食諸縣之粟破之寔難今新至疲
弊如乘其驕惰盡銳攻之則頃刻之間功可成矣衆

曰諾遂分番與戰果大敗之擒其僞帥俘斬無算諸
縣復平遂乘勝率舟師以進五月與戰于望江又戰
小孤山及彭澤又戰龍開河皆破走之進復江州留
兵守之七月進兵攻蘄州擒其僞帥鄒普泰遂克其
城進兵道士洑焚其柵抵蘭溪口賊之巢曰黃連砦
又克而殲之分兵平兩巴河於是江路始通十一月
與蠻子海牙四川行省參知政事哈臨禿左丞桑禿
失里西寧王牙罕沙軍合而湖廣左丞伯顏不花等
軍皆會十二月分道進攻蘄水縣拔其僞都護僞將
相而下四百餘人徐壽輝僅以身免以功詔賜上尊

黃金帶時丞相脫脫方總戎南征聞諸賊皆已破乃檄伯顏不花征淮東蠻子海牙守裕溪口威順王還武昌而卜顏鐵木兒獨控長江十六年六月復以軍守池州十一月卒卜顏鐵木兒持身廉介人不敢干以私其爲將所過不受禮遺宴犒民不知有兵性至孝幼養於叔父阿术事之如親父常乘花馬時稱爲花馬兒平章云

星吉

星吉字吉甫河西人曾祖朵吉祖搠思吉朵而只父搠思吉世事太祖憲宗世祖爲怯里馬赤星吉少給

事仁宗潛邸以精敏稱至治初授中尚監改右侍儀兼修起居注拜監察御史有直聲自是十五遷爲宣政院使出爲江南行御史臺御史大夫時承平日久內外方以觀望爲政星吉獨持風裁御史行部必勑厲而遣之湖東僉事三寶住儒者也性廉介所至搏貪猾無所貸御史有以自私請者拒不納則誣以事劾之章至星吉怒曰若人之廉孰不知之乃敢爲是言耶即奏杖御史而白其誣執政者惡之移湖廣行省平章政事湖廣地連江北威順王歲嘗出獮民病之又起廣樂園多萃名倡巨賈以網大利有司莫敢